

Ils chors sursilvans a Laax

Vendergis ein delegadas e delegai dils chors sursilvans s'entupai a Laax alla radunonza annuala. Denter ils presents ha il president dil District da cant Surselva, René Buchli, beneventau era la presidenta cantunala Lucretia Bärtsch.

AUGUSTIN BEELI/FMR

«Mo vus cheu en Surselva haveis quella caschun. Prendei part, e seigies loschs da vies district e sias purschidas», ha la presidenta cantunala getg en siu cuort salid alla radunonza. Sco *Lucretia Bärtsch* ha sincerau eis ella vegnida bugen a Laax. *René Buchli*, il president dil District da cant Surselva (DCS) ha saviu beneventar vendergis sera ella e rodund 50 delegadas e delegai dils chors sursilvans. Sco el ha informau en siu rapport fagevan la fin digl onn 32 chors, da quei 26 chors mischedai cun 673 cantaduras e cantadurs ed otg chors virils cun 276 cantadurs, part dall'uniun tetgala.

Scena activa

Cant e musica influenzeschan dapi varga 170 onns la cultura populara sursilvana. Il 21avel tschentaner semida la scena da chors denton. Alla fiasta districtuala 1998 a Vella fagevan 58 formaziuns part dall'uniun districtuala, 25 onns pli tard eis ei aunc 32 cun totalmein 949 commembers. Quels ein activs, embelleschan

en lur vitgs fiastas profanas ed ecclesiasticas ed envidan a concerts. Il DCS sustegn e promova els cun perfecziunament, sentupadas e fiastas regionalas. Alla radunonza da delegai da vendergis han dus chors da Laax representau quella varietad. Il chor viril ha beneventau ils presents sut la direcciun dad *Ueli Camathias* ed il chor mischedau ha cantau pils novs veterans sut la direcciun da *Rest G. Tuor*.

Sonda proxima, ils 13 da matg, envida dil reminent il chor d'affons TICO a concert a Laax. En connex culla promoziun dils affons e giuvenils porscha il DCS dapi prest 25 onns il camp da stad a Trun. L'entschatta uost 2022 han 85 affons da tuttas vegliadetgnas cantau ed exercitau in program e presentau in concert final divertent e variont. Quella purschida ei pusseivla grazia a personas che s'engaschan cun bia entusiassem ed idealissem per la caussa.

Scolaziun cun Letizia Scherrer

In contrast leutier ein novitads da chors che sesligian. Aschia ha il president districtual rapportau ch'il Chor mischedau da Rabius hagi

fatg quei, il triep restont vegni a s'integrar els chors dils vitgs vischinonts.

Il president dalla cumissiun da musica, *Daniel Pally*, ha informau la radunonza en connex cul compliment dalla presidenta cantunala Lucretia Bärtsch.

Il DCS organisescha en collaboraziun cull'Uniun ceciliania Surselva e la Scola da musica Surselva ina scolaziun culla cantadura *Letizia Scherrer*. La purschida cun in abbonament per scolaziun da vusch el chor includea in register maxi per 7,5 lecziuns, in register mini per 4,5 sco era lecziuns singulas per cantaduras e cantadurs. Ei seigi in caschun unica el Grischun, ha Daniel Pally declarau, quater chors seigien gia s'annunziai.

Pigl auter organisescha il DCS puspei il camp da cant per affons gl' uost 2023, plinavon dat ei la fin november ina «sera da notas» a Glion. Il schaner ni fevrer 2024 ein ils chors virils e mischedai envidai da separticipar ad in exercezi communabel per cantar las canzuns generalas dalla fiasta districtuala a Trun (*mira scaffa giudem*).

«Trun conta», ils 15 da zercladur 2024

«Vus haveis retschiert nies invit. Ussa selegrein nus fetg da vossas annunzias», ha *Rico Schwarz*, il president dil Chor cecilian da Trun, getg. El fa part dil comite d'organisasiun dalla 46avla fiasta da cant sursilvana. El ha substituiu alla radunonza il president *Giusep Giuanin Decurtins*.

Gl'onn 2024 ei cumbinada per la populaziun da Trun cun bia lavur, mo era bia planschers. «Nossa finamira eis ei d'organisar ina fiasta en vestgiu popular. Ina che dat caschun da tgirar e promover la cultura da cant, da s'entupar e star da cumpignia. Nus lein integrar la fiasta el vitg ed il vitg ella fiasta», ei il motto dil comite.

Sonda, ils 15 da zercladur 2024, selegrein ils da Trun sch'ils 32 chors commembers dil District da cant Surselva ed enqual d'ordeifer separticipeschan. Igl ei la sisavla gada che Trun organisescha la fiasta. L'emprema gada ei quei stau 1879 cun 19 chors e 1905 cun 18 chors, lu gl'onn 1930 cun 31 chors e 1960 cun 40 chors. Il center dalla fiasta 2024 ei en ed entuorn la casa da scola e center communal. Enstagl d'ina tenda da fiasta gronda dat ei quater pli pintgas. Tuttas producciuns da pag vegnan ad esser ella baselgia parochiala da s. Martin. Quella porscha plaz a 500 personas. Leu ha mintga chor peda da presentar alla giuria ina producciun da pag da maximal-

mein 15 minutas. «Ei legrass nus, sch'ils chors savessen risguardar en lur producciun gl'eveniment historic d'avon 600 onns», scriva il comite en siu invit. Sco quei che Rico Schwarz ha declarau a Laax collavura il comite stretgamente cullas autoritads communalas, culla supprastonza dil DCS e cul comite «Sut igl ischi 2024 – 600 onns Ligia Grischa». 200 voluntaris vegnan a segidar da preparar ed installar la fiasta da cant.

Detagls dalla fiasta da cant 2024 cullas adressas da contact, comite, plans e detagls anfl'ins ella pagina d'internet www.trunconta.ch, ed era www.surselva-conta.ch



FOTO AUGUSTIN BEELI

Meritau la honur

La suprastanza districtuala ha undrau endisch umens e treis dunnas sco veteranas e veterans districtuals. La guva d'honor cul motiv da Dea Murk han els retschert per 25 onns fideivladad. Las suandontas persunas han retschert la distincziun:

Toni Camathias, Carli Arpagaus, Umberto Camathias ed *Ivan Brunold*, tuts Chor viril Laax;

Giuanina Albin, Chor mischedau Surrein; *Merens Deplazes*, Chor viril Breil; *Jürg Adam*, Chor viril Flem-Trin; *Ursin Blumenthal* e *Silvana Caviezel*, omisdus Chor mischedau Vignogn; *Enrico Casanova*, Chor viril Lumnezia; *Peter Inauen*, Chor mischedau Flond; *Armin Cadalbert*, Chor mischedau Rueun-Stat; *Andrea Montalta* e *Martin Tischhauser*, omisdus

Chor mischedau Schluein. Plinavon ha il District da cant Surselva undrau specialmein ina dirigenta ed in dirigent per 20 onns fideivladad.

Igl ein quei *Flavia Walder* che meina 20 onns il Chor mischedau Sevgein ed *Armon Ulber* che ha dirigiu 20 onns il Chor mischedau Schluein.